

ZAPISNIK
O RADU SEDME RADNE SJEDNICE SKUPŠTINE KANTONA SARAJEVO ODRŽANE
19.04.2023.GODINE SA POČETKOM RADA U 11,00 SATI

Sedmu radnu sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Sjednici je prilikom otvaranja prisustvovalo 28 zastupnica i zastupnika, a u daljnjem toku se priključio još jedan zastupnik, kako slijedi:

SDA - STRANKA DEMOKRATSKE AKCIJE

1. Dević Mahir
2. Kalem Adi
3. Kapidžić Faruk
4. Selmanović Faruk
5. Viteškić Smiljana
6. Zahiragić Haris

POLITIČKA ORGANIZACIJA "NAROD I PRAVDA"

1. Kristić Danijela
2. Mehmedagić Mersiha
3. Memić Arijana
4. Okerić Elvedin
5. Pabrić Rusmir
6. Vreto Elvis

SOCIJALDEMOKRATSKA PARTIJA BOSNE I HERCEGOVINE

1. Avdić Samir
2. Čengić Irfan
3. Čičić Davor
4. Kapo Belma
5. Pekić Jelena

POLITIČKA ORGANIZACIJA GRAĐANA "NAŠA STRANKA"

1. Bešlija Vildana
2. Handžić Vibor
3. Melank Miomirka

STRANKA ZA BOSNU I HERCEGOVINU

1. Bandić Muamer
2. Gaković Elza
3. Gavrankapetanović-Smailbegović Fatima
4. Hodžić Admela
5. Šaljić Jasmin

DEMOKRATSKA FRONTA

1. Hašimbegović Marijela
2. Vujović Vedrana
3. Zuhrić Albin

POLITIČKA ORGANIZACIJA/INICIJATIVA “ZA NOVE GENERACIJE”

1. Marjanović Damir

Izostanak sa ove sjednice opravdali su zastupnica Sanela Klarić i zastupnik Aljoša Čampara, dok je kašnjenje najavio zastupnik Ilijaz Pilav.

Nakon intoniranja državne himne, predsjedavajući je pozvao zastupnice i zastupnike da odaju počast pripadnicima Armije R BiH i MUP-a BiH koji su dali svoje živote u odbrani od agresije na Bosnu i Hercegovinu, svako na svoj način.

Potom je uputio pozdrave zastupnicama i zastupnicima u Skupštini Kantona Sarajevo, članovima Vlade Kantona Sarajevo, svim prisutne u sali, kao i predstavnicima medija koji prate rad sjednice.

Prije prelaska na utvrđivanje Dnevnog reda predsjedavajući je upoznao prisutne da je na osnovu Odluke Centralne izborne komisije BiH, broj: 06-1-07-1-135/23 od 05.04.2023.godine, Kristini Petrović, sljedećoj kvalificiranoj kandidatkinji sa liste političkog subjekta SDP – Socijaldemokratska partija Bosne i Hercegovine za Opće izbore 2022.godine, dodijeljen mandat zastupnika u Skupštini Kantona Sarajevo.

Stoga je u skladu sa članom 8. Poslovnika Skupštine Kantona Sarajevo, pozvao zastupnicu Kristinu Petrović da pristupi davanju svečane izjave. Nakon položene svečane izjave, predsjedavajući je novoizabranoj zastupnici uputio čestitke u ime Skupštine i u svoje lično ime.

U radnom dijelu sjednice, predsjedavajući je istakao da je Prijedlog dnevnog reda Sedme Radne sjednice Skupštine Kantona Sarajevo utvrdio Kolegij Skupštine na sjednici održanoj dana 06.04.2023.godine, a isti je dopunio na sjednici Kolegija održanoj dana 14.04.2023. godine.

Potom je dao Dnevni red za Sedmu radnu sjednicu Skupštine Kantona Sarajevo na izjašnjavanje i isti je usvojen jednoglasno (28 „za“, bez glasova „protiv“ i „suzdržan“), kako slijedi:

1. Poslanička/zastupnička pitanja inicijative i odgovori;
2. Verifikacija odluka Odbora za javna priznanja Kantona Sarajevo za 2022. godinu;
3. Prijedlog Odluke o izmjeni naziva ulice, odnosno preimenovanje ulice, na području Općine Novo Sarajevo;
4. Prijedlog Odluke o davanju naziva cesti, na području Općine Stari Grad Sarajevo;
5. Prijedlog Odluke o davanju naziva dijelu ulice na području Općine Centar.
6. Prijedlog Odluke o imenovanju Etičkog vijeća Skupštine Kantona Sarajevo
7. Prijedlog Odluke o izmjeni Odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo
8. Program obilježavanja Dana Kantona Sarajevo od 02. do 09.05.2023. godine

Prije prelaska na realizaciju dnevnog reda, predsjedavajući je pozvao zastupnike da razmatraju Zapisnik sa stenogramom sa Pete radne sjednice Skupštine Kantona Sarajevo. Obzirom da nije bilo primjedbi na isti, pozvao je zastupnice i zastupnike da se izjasne o istom.

Na osnovu rezultata glasanja, predsjedavajući je konstatovao da je Skupština jednoglasno potvrdila Zapisnik sa Pete radne sjednice Skupštine Kantona Sarajevo održane 24.03.2023.godine s 29 glasova „za“ i bez glasova „protiv“ i „suzdržan“.

TOK SJEDNICE

Realizacija prve tačke dnevnog reda je počela u 11 sati i 37 minuta.

AD – 1.

POSLANIČKA/ZASTUPNIČKA PITANJA, INICIJATIVE I ODGOVORI

Predsjedavajući je otvorio tačku i dao riječ zastupnicima.

Zastupnica Fatima Gavrankapetanović-Smailbegović je podnijela sljedeće (citiramo): „Poštovani predsjedavajući, dopredsjedavajući, članovi Vlade, kolege zastupnici, ja imam dva pitanja za ministra zdravstva, profesora doktora Harisa Vranića. Prvo pitanje je kada će se raspisati konkurs za specijalizacije čije je financiranje uvršteno u budžet i da li postoji mogućnost da određeni broj specijalizacija finansiraju općine i Zavod za zapošljavanje? Drugo pitanje je da li se može definisati ili eventualno doraditi zakonska procedura po kojoj bi ljekari opšte prakse mogli se zapošljavati i u druge javne zdravstvene ustanove kao sekundarci, a ne samo u Domove zdravlja i Hitnu medicinsku pomoć? Znamo da Domovi zdravlja i Hitna medicinska pomoć ne mogu primiti sve ljekare koji su sada na evidenciji Zavoda za zapošljavanje, trenutno ih ima 91. Ako im se omogući da budu primljeni u druge zdravstvene ustanove, to bi bilo od velike pomoći u procesu rada, stekli bi potreban staž za specijalizacije i, što je najvažnije, ne bi trebali tražiti zaposlenje van granica naše zemlje. Zahvaljujem se i tražim usmeni odgovor“.

Zastupnik Damir Marjanović je podnio sljedeće (citiramo): „Pokret za Nove Generacije je mlada ekipa, momci, djevojke iz Pokreta su pripremili za danas par inicijativa, te inicijative idu od diapazona za izradu digitalne brošure o načinu postupanja stanovnika Kantona Sarajevo u slučaju otuđenja ili gubitaka lične dokumentacije, preko pojačane kontrole saobraćaja kroz ulicu Alipašina i obezbjeđivanje veće sigurnosti pješaka, ali i vozača koji svakodnevno koriste ovaj putni pravac, pa do toga da se treba riješiti česti i kontinuirani problem nedostataka citostatika za onkološke pacijente. Tako da s druge strane sugeriramo i imamo inicijativu vezano za reviziju Programa mjera aktivnih politika zapošljavanja sa ciljem analize moguće zloupotrebe programa, kao i jednu jako bitnu inicijativu besplatno liječničko osiguranje za perspektivne sportiste, tj reprezentativce i predstavnike države u svim sportovima koji dolaze s područja Kantona Sarajevo. Kao što vidite, nabrojao sam te inicijative, ali detaljnije ćemo se osvrnuti na jednu jako bitnu inicijativu. Tražimo da Skupština Kantona Sarajevo u suradnji sa resornim ministarstvom imenuje komisiju koja će utvrditi zdravstvenu i higijensko stanje štíćenika, kao i kapacitiranost stručnih kadrova za evidentirani broj štíćenika u Zavodu za zbrinjavanje mentalno invalidne djece i omladine Pazarić. Znamo da je to pod federalnim nivoom, ali Kanton Sarajevo ima svoje određene ingerencije i financiranje. Ima puno pravo da ispita trenutnu situaciju koja, prema našim informacijama sa terena, je daleko od onoga što bi se moglo reći zadovoljavajuća. Normalno, ove inicijative ćemo dostaviti pisano putem e-maila već u narednih 5 do 6 minuta. Uporedo s ovim inicijativama postavljamo 3 pitanja. Prvo pitanje je na osnovu kojih istraživanja se može potvrditi da Nacrtom privremene odluke propisane mjere zaštite osiguravaju bolju zaštitu izvorišta u odnosu na one koje su do sada važeće i važe za zaštitu izvorišta vode za piće u

Sarajevskom polju iz 87. godine. Zašto postavljam ovo pitanje? Prošle sjednice, tj jučer je trebala biti razmatrana ova tačka. Ono što nam je veliki problem u toj cijeloj priči, nismo vidjeli tu dokumentaciju, studiju. Znamo da će se ta tačka razmatrati u nekim budućim je li sjednicama. Hajte da to predupredimo, da ne gubimo vrijeme tada na toj tački, da ne gubimo vrijeme na tome da nemamo dokumente, insistiramo i tražimo da se dostavi dokumenti studija vezano za zaštitu izvorišta u Sarajevskom polju. Sljedeće pitanje je da li je Ministarstvo saobraćaja Kantona Sarajevo upoznato sa terminima realizacije, završetka sanacije dijela saobraćajnice ulice Alipašina dio od stadiona Koševo prema Barama i na koji način Ministarstvo saobraćaja Kantona Sarajevo može ubrzati ovaj proces, s obzirom da je riječ o federalnoj cesti koja je veoma preopterećena, čiji završni dio sanacije traje već duže vrijeme i tu imamo problem sa saobraćajem. I na kraju, htio bih se zahvaliti Ministarstvu za visoko obrazovanje, nauku i mlade. Dostavili su mi odgovor vezano za ideje oko financiranja znanstvenih projekata i ideje ustvari ponavljanje one stare ideje o tome da će se fondacija kreirati, da će fondacija riješiti način finansiranja znanstvenih projekata. Međutim ta fondacija neće zaživjeti u 2023. godini stoga bih zamolio usmeni odgovor na pitanje kako Ministarstvo planira da iznađe kratkoročno rješenje, urgentno rješenje za 2023? Već se nalazimo u četvrtome mjesecu, ako projekti se raspišu u petom ili šestome, a njihovo odobravanje će biti negdje u osmome ili devetome mjesecu, onda će svi oni koji su prijavili se za te projekte i dobili novac preko tih tih projekata morati tri do četiri mjeseca, evo, završavam, u roku od 3 do 4 mjeseca morat će da realiziraju javne nabavke i u krajnjem slučaju realiziraju projekte. Znači, zanima me kratko rješenje za 2023. godinu.”

Zastupnik Jasmin Šaljić je podnio sljedeće (citiramo): „Ja sam imao dva pitanja. Prvo, zamolio bih nadležna ministarstva MUP-a Kantona Sarajevo ili saobraćaja da nam samo kratko odgovori da li su razmatrali inicijativu koju sam podnio prije 2 mjeseca, a odnosi se na deinstalaciju radara na dionici puta A 1, jer vidjeli smo da javnost nije prihvatila tu odluku da se instalira 7 novih radara, oni nemaju svoj učinak jer građani Kantona znaju gdje se nalaze radari. Znači oni imaju svrhu da iskažnjavaju ljude koji su u proputovanju, pa bih zamolio da to uradimo prije ljeta, prije turista jer to je nezabilježeno u Europskoj uniji, da na 20 km neko instalira 7 redara, pa samo da neko kratko kaže da li su razmatrali tu inicijativu, da se to deinstalira i da se kamere stave pored osnovnih škola i vrtića u Kantonu Sarajevo? I može bilo ko odgovoriti kratko.

I druga inicijativa je, to je pitanje za gradonačelnicu Karić ili za nekoga, za Gradsko vijeće, a pitanje je vezano za jedan od simbola Sarajeva to je naša Vijećnica. Ko donosi odluke da se Vijećnica povremeno osvijetli zastavama pojedinih država ili značajnim ličnostima? Ko donosi te odluke? Jel to gradonačelnik ili Gradsko vijeće ili Kabinet gradonačelnika? Postoji li neka komisija? Ako postoji da nam dostavite imena ko je formirao tu komisiju? Postoje li na kraju kriterije po kojima neko donese odluku da, recimo, osvane zastava te i te države. Neki dan je na Vijećnici osvijetljen lik generala, legendarnog Jovana Divjaka. Naravno da pozdravljam tu inicijativu. Pa tamo kaže neko čika Jovo. Jel to bilo posvećeno čika Jovi ili generalu Armije Republike Bosne i Hercegovine Jovanu Divjaku. Ako je već, imamo te kriterije. Zašto nemamo onda za devet heroja? Zašto nikad ta komisija ne stavi godišnjica devet heroja koji su Odlukom tadašnje Republike Bosne i Hercegovine proglašeni narodnim herojima: Safet Hadžić, Safet Zajko, Enver Šehović, Izet Nanić, Midhat Hujdur, Nesib Malkić, Adil Bešić, Hajrudin Mešić, Mehdi Hodžić, zašto nisu oni na Vijećnici? Pa plus imam recimo, pa Vinko Šamarlić, koji je umjesto na Olimpijadi otišao u na borbeni zadatak, dao svoj život, pa imamo Smaju Šikala, Čedomira Domuza, Sašu Petrovića, Ramiza Salčina, majora Mihajla Petrovića koji je zaslužan za oslobođenje Travnika, imamo Sretena Lojanicu. Zašto ovi ljudi nikad po tim kriterijima ne mogu da budu na Vijećnici?“

Zastupnik Irfan Čengić je podnio sljedeće (citiramo): „Imam pitanje za premijera i za rukovodstvo Skupštine, kada ćemo konačno dobiti Program rada Vlade i Program rada Skupštine? Dakle već ulazimo u peti mjeseci, nemamo ni program rada Vlade, ni program rada Skupštine.

Dakle, ne zanima me zašto nemamo, već kada ćemo dobiti, jer mislim da zbog toga, pogledao sam našu novu web stranicu, dio materijala u proceduri. 60 materijala je u proceduri. Dakle mi da bi ispunili sve te materijale, morat ćemo često zasjedati, a ono što me zabrinjava, od tih 60 materijala, preko 60, samo je 10 % zakona, što znači, a mi smo prije svega zakonodavni dom, a ovdje smo se pretvorili u inicijativni dom i samo nake inicijative razmatramo i slično, umjesto da razmatramo zakone i ono što je naša osnovna uloga. I zanima me kada će Vlada dostaviti svoj Program rada i kada će Skupština dostaviti svoj Program rada? Imam 4 pitanja za ministre, dakle za ministra privrede, kada će dostaviti Zakon o javno-privatnom partnerstvu jer je obavljena javna rasprava i koliko znamo nije u materijalima ga nema da je u Skupštinu stigao. Dakle, kada će doći na dnevni red Zakon o poslovnim prostorima, dakle to je zakon koji smo preuzeli iz Jugoslavije, pa smo ga nekoliko puta mijenjali kako bi pogodovali određenim načelnicima i kada smo ga mijenjali, zaboravili smo da i Grad i Kanton ima svoju imovinu, pa smo stavljali samo tamo općinski prostori. I taj zakon se, dakle, koristi kako bi se maltretirali ljudi, zakupci u općinskim prostorima u pojedinim općinama i on stoji u programu naše koalicije. Zanima me kada će biti na dnevnom redu novi Zakon dakle, o poslovnim prostorima? To je za ministra privrede. Za ministra unutrašnjih poslova. Imao sam i ranije pitanje za novi Zakon o javnom redu i miru“.

Dopredsjedavajuća Danijela Kristić je podnijela sljedeće (citiramo): „Pitanje za ministra Vranića, ako može usmeni odgovor. Zaključci o izmjenama Uredbe kojom se treba potpuno ukinuti dobna granica i kojom bi svi oboljeli od Dijabetesa tip 1 ima li mogućnost besplatnih senzora za mjerenje šećera u krvi trebali su biti prosljeđeni na Vladu Kantona Sarajevo. Da li je upućeno na Vladu jer, kao što znate, sredstva su obezbijedena?

Druga inicijativa. Na osnovu vijesti da je MUP Kantona Sarajevo potpisivanjem Sporazuma o uvjetima i načinu neposrednog pristupa povezivanja i uvida u elektronsku evidenciju zemljišnih knjiga za nekretnine Kantona Sarajevo postaje prvi kanton sa aktivnim e-gruntom u postupcima prijave i odjave prebivališta i boravišta, građani Kantona Sarajevo više neće morati prilagati ZK izvadak. Stoga podnosim inicijativu da Ministarstvo komunalne privrede, infrastrukture, prostornog uređenja, građenje i zaštite okoliša i njegov sektor za upravljanje, realizaciju projekata i nadzor u stambenoj ovlasti primjeni ista iskustva. Iste podatke bi koristila i Kantonalna uprava za inspeksijske poslove. Molim MUP Kantona Sarajevo da prenese svoja iskustva, a Zavod za informatiku i statistiku Kantona Sarajevo da pruži potrebnu tehničku podršku pri realizaciji.“

Zastupnica Mersiha Mehmedagić je podnijela sljedeće (citiramo): „Imam pitanje za Ministarstvo saobraćaja. Naime, tražim detaljnu informaciju o statusu sporazuma o regulisanju međusobnih prava i obaveza između Kantona Sarajevo, Ministarstva saobraćaja i općine Trnovo na zajedničkoj izgradnji podzemne garaže na Bjelašnici.

I podnosim zastupničku inicijativu prema Službi za skupštinske poslove, Zavodu za informatičku i statistiku i Ministarstvu pravde i uprave Kantona Sarajeva da se uspostavi web portal za potrebe učešća građana u javnim raspravama pri donošenju nacрта i prijedloga zakona elektronskim putem, po uzoru na portal kakav ima Vlada Republike Hrvatske, uz obrazloženje da bi uvođenjem elektronskog savjetovanja se osiguralo veće učešće zainteresovane stručne javnosti u procedurama donošenja zakona, te olakšao i skratio postupak dostavljanja primjedbi i prijedloga i amandmana predlagačima. Ovaj korak bi, naravno, pomogao znatno i donosiocima odluka da dođu do što boljih zakonskih rješenja.“

Zastupnik Muamer Bandić je podnio sljedeće (citiramo): „Imam dva pitanja. Jedno pitanje se odnosi na ministra za visoko obrazovanje i mlade. Dakle, uvaženi ministre, Skupština Kantona Sarajevo je na Petoj radnoj sjednici potvrdila Prijedlog odluke o potvrđivanju Vlade Kantona Sarajeva, a koja Odluka se odnosi i na vas kao ministra za nauku i visoko obrazovanje i mlade. Dakle Skupština Kantona Sarajevo, je na osnovu CV-ija koji ste vi nama ovdje predočila,

dala vama povjerenje kao ministru da obavljate svoju funkciju u skladu sa članom 56 i sa članom 57. Zakona organizacija organa uprave, vi ste obavezni da svoje poslove obavljate na način kako vam je to propisano. Naime, vi ste Rješenjem od 27.03.2023 godine ovlastili sekretara Ministarstva za visoko obrazovanje mlade Kantona Sarajevo. Tim ovlaštenjem ste mu dali da u potpunosti pregleda poštu, da raspoređuje akte ili predmete na organizacione jedinice, odnosno radna tijela ili radna mjesta izvan organizacionih jedinica, kojim se predmeti dati akti trebaju dostavljati na rad. Također ste tim ovlaštenjem dali mogućnost vršenja i svih nadležnosti iz Ministarstva za nauku visoko obrazovanje i mlade Kantona Sarajevo da čak potpisuje sve akte koji proizilaze iz rada ovog Ministarstva. Da apsurd bude veći, drugim Rješenjem kojim ste omogućili ovom istom državnim službeniku da sve ove dokumente može on sam opečatiti, praktično da može rukovoditi potpuno ovim Ministarstvom. Ono što ja želim da vam skrenem pažnju, dakle, da smo mi baš svoje povjerenje poklonili vama kao ministru, da vi obavljate ovu funkciju, a nikako nekom državnim službeniku koji u principu nama nije ni odgovoran po Zakonu o državnoj službi. Dakle, ja ću vam pročitati član 57. Ministar je obavezan na osnovu i u okviru Ustava, zakon i drugih propisa savjesno i odgovorno vršiti svoje poslove. U posljednjoj alineji tog člana, dakle, ministar, ministar koji rukovodi ovim ministarstvom dužan je o svim pitanjima da izvještava izvršni organ, tako isto i Skupštinu Kantona Sarajevo. Na temelju ovog Zakona dakle, ministre, evo, ja želim da vam skrenem pažnju da ovo vaše Rješenje nije bilo doneseno u skladu sa zakonom, čak ovo Rješenje, ja sam jako dobro pročitao zasniva ste na član 56, mada vam neko ko je izrađivao ovo rješenje trebao je staviti član 57, da pogledate koja je odgovornost ministra. Tako da zahtijevam u narednom periodu, odnosno da mi se usmeno odgovorite kada ćete izmijeniti ovo Rješenje.

Drugo zastupničko pitanje se odnosi na direktora Kantonalne uprave za inspeksijske poslove. Dakle Kantonalna uprava za inspeksijske poslove kao samostalni organ uprave ovlaštene za pristup tajnim podacima, a također i njihovu klasifikaciju u skladu sa Zakonom o zaštiti tajnih podataka. Na osnovu kojeg člana propisa, i na osnovu koje je suglasnosti direktor napravio mogućnost da on određuje ko može ustvari imati pristup tajnim podacima i koga on ovlašćuje da ima pristup tajnim podacima? Rukovodilac Kantonalne uprave za inspeksijske poslove i bilo koji drugi uposlenik ovlašten za pristup tajnim podacima u skladu sa Zakonom o zaštiti tajnih podataka i da li je rukovodilac ili bilo koje drugo uposlenik certificiran da klasificira i dodjeljuje stepen tajnosti podataka u skladu sa Zakonom o zaštiti tajnih podataka? S obzirom na navedeno, medijski nastupi, a u vezi dodjeljivanja stepena tajnosti aktima prilikom traženja međunarodne pravne pomoći, Kantonalna uprava za inspeksijske poslove je ugrozila jedan dio istrage koji se odnosi na tajne podatke. I molim direktora da mi dostavi podatke o svim osobama koje su imala ovlaštenje da, ovlaštenje za tajne podatke, odnosno koji su certificirani za upravljanje tim tajnim podacima.“

Zastupnica Belma Kapo je podnijela sljedeće (citiramo): „Moja inicijativa i pitanje se odnosi na Ministarstvo zdravstva i bolničke ustanove u okviru u Kantonu Sarajevo. Molim vas da se obezbijede kreveti za majke ili očeve ili pratnju djece koja se nalaze na bolničkom liječenju za vrijeme dok su oni tamo jer mislim da je stvarno nedopustivo da u svakom odjelu ili na svakoj klinici majka nema krevet za vrijeme dok je dijete na liječenju, neke majke provedu u noć na stolici. Ovaj Kanton zaista mora imati sredstva da se taj problem riješi. Pozivam zdravstvene ustanove da iskreno odgovore na pitanje koje ću ja preko Ministarstva zdravstva poslati, da li na svakom odjelu imaju krevet za majku ili pratnju djeteta? Ukoliko nemaju šta je to njima potrebno da bismo realizirali ovu inicijativu? Znam da postoje u na nekim odjelima kreveti u koje majka zajedno sa djetetom boravi, mislim da i to nije rješenje. Također, molim Ministarstvo zdravstva i javne ustanove bolničke da mi dostave informaciju na osnovu kojih zakonskih akata ili propisa, ja ih nisam mogla naći, je određena dobna granica djeteta koje ima pravo na pratnju majke, roditelja ili staratelja za vrijeme bolničkog liječenja. Zamolila bih da se ta dobna granica pomakni na 10 godina za svu djecu, odnosno po posebnim kriterijima za djecu koja su onkološki pacijenti,

nažalost, ili djecu koja imaju posebne potrebe, tako da oni sigurno mogu i stariji imati pratnju roditelja. Evo da se za ostalu djecu obezbijedi pratnja barem do 10 godina, jer djeca dovoljna im je trauma to što su na liječenju u bolnici još dodatno im sigurno psihički predstavlja trauma kada ostanu sami na bolničkom liječenju.“

Predsjedavanje sjednicom je nakratko preuzela dopredsjedavajuća Danijela Kristić.

Zastupnica Elza Gaković je podnijela sljedeće (citiramo): „Prvu svoju inicijativu pokrećem prema Ministarstvu privrede za sufinansiranje rješavanja imovinskopravnih odnosa za izgradnju trajne regulacije rijeke Bosne u Rajlovcu. Svjedoci smo u novembru mjesecu 2021. godine, kad je rijeka Bosna, usljed velikih padavina se izlila i iz neregulisanog korita je napravila enormne štete privrednim subjektima u Privrednoj zoni Rajlovac. U cilju zaštite Privredne zone Rajlovac od budućih potencijalnih poplava, iniciram sufinansiranje nastavka rješavanja imovinsko pravnih odnosa na trasi trajne regulacije rijeke Bosne kao preduslov za izgradnju trajne regulacije. Neophodno je proaktivno i intenzivno raditi na trajnoj regulaciji rijeke Bosne u Rajlovcu kako bi se spriječile poplave u industrijskim poslovnim subjektima čija je šteta desetina miliona konvertibilnih maraka samo od jedne poplave, a projekat trajne regulacije koju bi spriječio ovakve posljedice u nekom budućem periodu koštati će 10 puta manje. Svoju drugu inicijativu za koju tražim izjašnjenje Kantona Sarajevo koju sam dostavila, ona glasi: upućujem inicijativu da se putem Vlade Kantona Sarajevo uputi zahtjev Uredu za reviziju institucija u Federaciji Bosne i Hercegovine da izvrši vanrednu reviziju cijene gasa kod snabdjevača gasom Energoinvest d.d Sarajevo i molim da se Skupština o istoj izjasni. Obrazloženje: Ured za reviziju Federacije Bosne i Hercegovine je izvršio kompletnu reviziju poslovanja Energoinvest d.d. Sarajevo u sklopu kojeg je utvrdio prihode Energoinvesta po osnovu prodaje gasa, kao i rashode nastale po osnovu nabavke gasa. Prihodi su iznosili 108 000 000, a rashodi su tu 102 000 000 konvertibilnih maraka. Istovremeno, u javnosti prisutna je polemika o nabavnoj i prodajnoj cijeni gasa te je zatraženo da Energoinvest javno objavi fakturu ruskog Gazproma ili da prezentuje nabavnu cijenu gasa. Kako je Energoinvest, kompanija u većinskom vlasništvu Federacije Bosne i Hercegovine, ne želi da objavi cijenu gasa nabavke gasa, tražim da ovom inicijativom Ured za reviziju uradi istu analizu kao 2021. godine jer je Ured nadležan za reviziju poslovanja kompanija u državnom vlasništvu. I stoga želim na bazi ove skupštinske inicijative da Ured analizira i odgovori na javno postavljena pitanja gdje će građani Kantona Sarajevo saznati punu istinu, kao što se to vidi za 2021. godinu. Reviziju tražim od 2022 godine i prva tri mjeseca za 2023 godinu. Vlada Kantone Sarajevo podržala je resorno Ministarstvo u pogledu zahtjeva za dodatno smanjenje cijene gasa i stoga tražimo istinu putem revizije poslovanja Energoinvest u dijelu nabavke gasa.

Imala sam i dva pitanja, samo mi je vrijeme isteklo i njih ću dostaviti pisanim putem.“

Zastupnica Miomirka Melank je podnijela sljedeće (citiramo): „U januaru ove godine sam podnijela inicijativu o proglašenju temeljnih institucija kulture od značaja za Kanton Sarajevo, odnosila se prije svega na 7 institucija od značaja za Bosnu i Hercegovinu. Sada na osnovu člana 106. Poslovnika Skupštine Kantona Sarajevo, Vladi KS upućujem inicijativu o proglašenju temeljnih strukovnih udruženja profesionalaca iz oblasti kulture od posebnog značaja za Kanton Sarajevo. Prije proglašenja potrebno je formirati stručnu komisiju sastavljenu od osoba sa rezultatima u oblasti kulture, ustanoviti kriterije za izbor udruženja prema godinama rada, kvalitetu i broju projekata, utjecaja na kulturnu scenu, značaja za kulturne radnike itd, a potom raspisati javni poziv i proglasiti temeljna strukovna udruženja od značaja za Kanton Sarajevo. Dosljedno programskim ciljevima razvoja i afirmacije kulture, Kanton Sarajevo potvrđuje svoje opredjeljenje podršci kulturi temeljnih udruženja i institucija u cilju stvaranja pretpostavki za afirmaciju izuzetnih kulturnih vrijednosti u njihovoj organizaciji na domaćem, regionalnom i međunarodnom nivou. Funkcionisanje ovih udruženja, koja se pored ustanova kulture mogu smatrati suštinskim jezgrom kulturne djelatnosti, treba podržati Kanton Sarajevo, proglašivši ih temeljnim, upravo zato što je

prema Ustavu Kantona Sarajevo utvrđivanje kulturne politike u nadležnosti Kantona Sarajevo. Pored toga, potrebno je u novi Nacrt zakona o kulturi unijeti nove stavove kojima se definišu procedure i kriteriji za proglašenje temeljnih udruženja i institucija od značaja za Kanton Sarajevo.“

Zastupnica Marijela Hašimbegović je podnijela sljedeće (citiramo): „Za današnju sjednicu pripremila sam dvije inicijative i dva zastupnička pitanja. Za jednu inicijativu tražit ću izjašnjenje Skupštine. Na osnovu člana 121. Poslovnika Skupštine Kantona Sarajevo predlažem da Skupština Kantona Sarajevo donese sljedeću Deklaraciju za očuvanje zona sanitarne zaštite i kvaliteta vode za piće izvorišta Sarajevsko polje. Polazeći od značaja očuvanje vode za piće i zona sanitarne zaštite i izvorišta Sarajevsko polje koje imaju za cjelokupni Kanton Sarajevo zbog izrazite zabrinutosti javnosti za očuvanjem kvaliteta zaštite izvorišta, a samim time i budućnosti vodosnabdijevanje Kantona Sarajevo, Skupština Kantona Sarajevo izražava svoj stav o nužnosti očuvanje granica zona sanitarne zaštite i izvorišta vode za piće u Sarajevskom polju, mjerama koje su određene odlukom o zaštiti izvorišta Sarajevsko polje, po njenom stupanju na snagu 1987. godine, te u svojim budućim djelovanjima obavezuje se za očuvanje postojećih mjera zaštite u istom prostornom obuhvatu, bez ublažavanja stepena zaštite nad postojećim zonama sanitarne zaštite izvorišta vode za piće koji se tiče bilo kojeg njihovog dijela. Također, Skupština Kantona Sarajevo izražava svoj stav i da se u najskorijem vremenskom roku obuhvat strožije zaštiti, proširi i na dodatna područja koja trenutno ili potencijalno ugrožavaju izvorišta vode za piće u Sarajevskom polju masovnom komercijalnom gradnjom, konkretno na prostorima planina i Igman i Bjelašnica. Pri zaštiti vodozaštitne zone Sarajevsko polje treba se rukovoditi najboljim praksama vodozaštite zemalja iz našeg okruženja i EU. Poduzeti koraci trebaju u svom segmentu i cjelini odražavati duh vremena u smislu najnovijih naučnih saznanja o štetnosti pojedinih ljudskih aktivnosti po kvalitet i kvantitet vode u izvorištima, te u pogledu urgentnosti i ozbiljnosti nadolazeće klimatske krize koja izaziva sve učestalije suše na našim prostorima. U doba parlamentarne okolišne krize, kada se zemlje širom svijeta bore da očuvaju svoju vodu, a one moćnije i nastoje oteti siromašnima, apsolutni prioritet je da Sarajevo očuva svoju vodu. Degradacija vodozaštitne zone bi Sarajlije osudila na vodu u plastičnim bocama, skupu, sumnjivog kvaliteta i po najnovijim naučnim saznanjima bogatu toksičnim mikročesticama plastike. Stoga apsolutni prioritet iznad svih stranačkih interesa i ciljeva mora biti očuvanje naše čiste vode. Tražit ću, naravno, izjašnjenje Skupštine, kao što sam rekla. Ja ne znam koliko još imam vremena, obzirom da imam još jednu inicijativu i dva pitanja.“

Zastupnica Admela Hodžić je podnijela sljedeće (citiramo): „Moje prvo pitanje upućeno je premijeru Kantona Sarajevo da nas izvijesti i tražim pismeni odgovor danas u toku odgovora usmenih odgovora na ovoj točki, koliko javnih kantonalnih poduzeća koji se finansiraju Budžetom Kantona Sarajevo nisu dostavili poslovni finansijski izvještaj, a bili su u obavezi za protekle godine. Ja ću pozvati ubuduće kolege zastupnike da razmislimo o usvajanju sljedećeg budžeta svima, zbog svih onih koji nam ne dostave izvještaj o poslovanju. Moje sljedeće pitanje upućujem direktoru Kantonalne javne ustanove za zaštićena područja Kantona Sarajevo i nadležno ministarstvo, zbog čega nije poduzelo ništa po pitanju inicijative koju sam uputila prema tada kako se zvalo Ministarstvu prostornog uređenja, građenje i zaštite okoliša, da donese odluku kojom će naložiti da se važeći cjenovnici usluga za posjetitelje Kantonalne javne ustanove zaštićena područja dopuni: pod 1. RVI ne plaća se uz dokument, pod 2. Porodice šehida i poginulih boraca ne plaća se uz dokument i osobe sa invaliditetom, ne plaća se uz dokument. Na osnovu odgovora na moju inicijativu, koja se čak dojmila i pozitivnim odgovorom prema primjedbama gore navedenih kategorija naših građana, do danas niste poduzeli ništa. Dio vašeg odgovora, navedeno i u ovom obrazloženju, dio obrazloženja u dijelu obrazloženja je pisalo da je u toku izrada novog cjenovnika, to ste dostavili krajem 2019. godine, 3,5 godine je u izradi izmjena tog cjenovnika, pa vas molim, evo, ako možda da ubrzate. Podnosim inicijativu Vladi Kantona Sarajevo i Ministarstvu komunalne privrede, infrastrukture, prostornog uređenja,

građenje i zaštite okoliša Kantona Sarajevo da u što skorije vrijeme poduzme sve potrebne aktivnosti i obezbijedi sve potrebne uvjete kako bi se izradila studija opravdanosti izgradnje fabrike vode na području Kantona Sarajevo. Obrazloženje: na isti način kako je to urađeno za pokretanje projekta izgradnje peletare u Kantonu Sarajevo, za koju je bilo potrebno izraditi Studiju opravdanosti za tu vrstu proizvodnje, a u nadležnosti Ministarstva privrede Kantona Sarajevo, pokrećemo ovu inicijativu prema Ministarstvu komunalne privredi, infrastrukture i prostornog građenja, uređenja, građenja, zaštite okoliša Kantona Sarajevo, u čijoj nadležnosti bi trebala biti ova vrsta djelatnosti. Nažalost, potrebno je uvijek da nam se desi neka kriza i rast cijena određenih energenata ili osnovnih životnih namirnica, a na štetu građana, kako bismo počeli koristiti resurse kao odgovorni političari i menadžeri, sa vizijom i strategijom za stvaranjem boljih uvjeta za život građana Kantona Sarajevo. Zahvaljujem, ostalo ću dostaviti u pisanoj formi.“

Zastupnik Samir Avdić je podnio sljedeće (citiramo): „Evo mogli smo na osnovu ovaj dvije inicijative prethodne, kolege Marjanovića i kolegice Hašimbegović, prepoznati koliko je veliki interes i ove Skupštine, a generalno smo mogli kroz medije ovaj prepoznati ogroman interes cijele društvene zajednice za jednu od tema koja će se naći na jednoj od narednih sjednica, a to je ovaj usvajanje Nacrta o vodozaštitnim zonama, odnosno o zaštiti izvorišta Sarajevsko polje. S tim u vezi mislim da je veoma važno, a kolega Marjanović se donekle dotakao te teme, a prije toga u nekim pripremama i drugi zastupnici. Ja sam imao priliku da vidim elaborat koji je urađen, odnosno usvojen od strane Skupštine Kantona Sarajevo 2014 godine. Radi se o ogromnom materijalu koji je sačinjen u najvećem dijelu od velikih mapa i karata, koje je tehnički jako teško sada skenirati i učiniti dostupnim u elektronskoj formi za sve nas i za zainteresiranu javnost, a s obzirom da smatram da donošenje odluke od strane ove Skupštine, ali i formiranje mišljenja javnosti mora biti zasnovano na potpunim informacijama i uvažavajući kompetencije struke, tu mislim na samu komisiju u kojoj su eminentni profesori sa Univerziteta u Sarajevu, ali i na relevantna ekološka udruženja u kojima trebamo prepoznavati partnere. Znači, treba i ta odluka i mišljenje javnosti trebaju biti zasnovani na potpunim informacijama i tim kompetencijama, a ne na osnovu različitih navoda i špekulacija koje možemo vidjeti u medijima. S tim u vezi iniciram da Ministarstvo privrede u narednom periodu, najmanje jednom, sedmično ili čak i u više termina, odredi termine kada će elaborat biti dostupan u jednoj od kancelarija Ministarstva za sve zastupnike koji su zainteresovani da ga vide, kao i za dio zainteresovane javnosti. Kada kažem dio, mislim na zvanična udruženja koja se bave ovom temom. Kasnije kada bude javna rasprava, taj materijal eventualno može biti dostupan i cjelokupnoj javnosti, ali u ovom sada periodu prije usvajanja na nacrt, predlažem da on bude dostupan, ponavljam, svim zastupnicima i zastupnicama, te svim zainteresiranim stručnjacima i zvaničnim, odnosno registrovanim udruženjima u kojima, ponavljam, trebamo prepoznavati partnere prilikom donošenja krajnje odluke o, krajnje odluke koja veoma značajna, ne samo za građane Ilidže, već i za građane cijelog Kantona Sarajevo.“

Predsjedavanje sjednicom preuzeo je predsjedavajući Elvedin Okerić.

Dopredsjedavajuća Jelena Pekić je podnijela sljedeće (citiramo): „Ja ću postaviti jedno zastupničko pitanje koje je upućena prema Ministarstvu za odgoj i obrazovanje KS i zamolit ću ministricu Naidu Hota-Muminović da usmeno odgovori kako bismo ovo pitanje pojasnili javnosti. Naime, meni su se obratili par roditelja sa upitom da je njihovoj djeci sa poteškoćama onemogućen asistent u privatnim predškolskim ustanovama. Dakle, ta vrsta, da kažem usluge, nije im dostupna u privatnim predškolskim ustanovama i ja bih zamolila ministricu da pojasni kako je regulisano angažovanje asistenata u privatnim predškolskim ustanovama i kakve su odgovornosti na takve slučajeve kada je u pitanju resorno ministarstvo, budući da je zaista resorno ministarstvo u prethodnom periodu poduzelo značajne aktivnosti, korake kada je u pitanju inkluzija odgoja i obrazovanja, a gdje prema informaciji koja je i razmatrana početkom prošle godine, broj djece sa

teškoćama u razvoju u javnim ustanovama, u Javnoj ustanovi "Djeca Sarajeva" i privatnim predškolskim ustanovama iznosio je 124. Dakle, iz informacije koja je dostupna javnosti. Budući da se radi o našoj najmlađoj populaciji, mislim da je ovo pitanje jako važno i da ministrica usmeno odgovori kako bi roditelji na ovaj način dobili potrebne informacije i dalje postupali kada su u pitanju privatne predškolske ustanove, a naročito kada imamo u vidu činjenicu da se sve te privatne predškolske ustanove upravo i nalazi u programu Vlade Kantona Sarajeva vezano za sufinansiranje boravka djece.“

Zastupnik Davor Čičić je podnio sljedeće (citiramo): „Ja ću imati danas jednu zastupničku inicijativu koja se odnosi na Zavod za zapošljavanje Kantona Sarajeva i Ministarstvo za rad, socijalnu politiku, raseljena na lica i izbjeglice Kantonu Sarajeva, a inicijativa se tiče da se kroz kreiranja programa Zavoda za zapošljavanje u 2023. godini kreira program vezano za podršku zapošljavanja nezaposlenih lica u turistički, hotelski i ugostiteljski sektor u Kantonu Sarajeva, odnosno da se kreira poseban program za podršku zapošljavanje nezaposlenih lica u privredne subjekte turističke, hotelske i ugostiteljske djelatnosti u Kantonu Sarajevu, a u suradnji sa poslodavcima iz tog sektora zbog velikog nedostatka kadra u tom sektoru, posebno za vrijeme ljetne sezone. U obrazloženju ću spomenuti da je, s obzirom da je turistički, hotelskih i ugostiteljski sektor u Kantonu Sarajeva jako važna privredna grana, a zbog jačanja stalnog i zbog sve jačeg i stalnog ulaganja Vlade Kantona Sarajeva u promociju Kantona Sarajeva kao važne turističke destinacije u ovom dijelu Europe i s obzirom na činjenicu da je, posebno u ljetnoj sezoni, značajno veća posjeta turista u Kantonu Sarajeva i veća je potreba i osjetan nedostatak radne snage u tom sektoru, smatram da je potrebno da Zavod za zapošljavanje u suradnji sa poslodavcima iz tog sektora osmisli program podrške zapošljavanju nezaposlenih lica i održavanju zaposlenosti u tom sektoru. Mislim i da bi zbog odliva sezonske radne snage iz Kantona Sarajeva, posebno u periodu sezone, sada nekad od maja pa do oktobra, ovakav jedan program pridonio i zadržavanju radne snage u Kantonu Sarajeva i pridonio i održavanju dugoročnih radnih mjesta u ovim djelatnostima. I sve ovo gore i sve taj neki program koji bi pomogao bi sigurno pomogao u poboljšanju ponude i usluge u turističkom sektoru Kantona Sarajeva, zadržavanju domaće radne snage u Kantonu Sarajeva.“

Zastupnica Vildana Bešlija je podnijela sljedeće (citiramo): „Ja ću pročitati jednu inicijativu. Odnosi se, odnosno na osnovu komunikacije sa udruženjima "Prijatelji životinja" i "Indi i šapice", inicijativu za obezbjeđivanje finansijskih i tehničkih uslova za uvođenje programa liječenja uličnih životinja. Financiranje liječenja uličnih životinja vezano je, odnosno i važno je ne samo zbog dobrobiti životinja, već i zbog zdravstvenih rizika koji takve životinje predstavljaju za ljude. Ti zdravstveni rizici uključuju prenošenje zaraznih bolesti koji se mogu prenijeti virusa, znači i na druge životinje. I zato smatram da je u interesu javnog zdravlja da se financiranje liječenja uličnih životinja obezbijedi. Financiranje liječenja uličnih životinja je važno, kao što rekoh, iz više razloga. Prije svega, to su živa bića koja zaslužuju da budu zaštićena od patnje i bola, a isto tako često su žrtve različitih zdravstvenih problema, kao što su zarazne bolesti, ozljede i drugi zdravstveni problemi i liječenje i može osigurati bolji i kvalitet života i produžiti njihov život. Također liječenje uličnih životinja ima i društvene koristi, zdrave životinja su manje vjerovatno da će prenijeti zarazne bolesti na ljude i drugih životinja, što pomaže u sprječavanju širenja bolesti i smanjenju rizika od epidemija. Osim toga, liječenje uličnih životinja također pomaže u održavanju dobrih odnosa između životinja i ljudi u našem kantonu, što može pomoći u sprječavanju napetosti i sukoba između njih.“

Zastupnik Elvis Vreto je podnio sljedeće (citiramo): „Imam jedno pitanje za ministra kulture i sporta Kenana Magodu. Nekako se moglo protumačiti u javnosti ove najave objave transparentnosti rada ministarstva, nekako kao da bivši ministar, Samir Avdić u ovom segmentu i Vlada nije radila dovoljno na transparentnosti, pa obzirom da je Vlada ima i kao sva ministarstva

kreiranu registar u Uredu za borbu protiv korupcije, da postoji Uredba koja je naložila da sve ugovore odluke izvještaja o dodjeli namjenskom utrošku sredstava bude pohranjeno i dostupno na uvid, ja bih zamolio ministra da nam pojasni šta je mislio pod ovim povećanim stepenom transparentnosti i evo, jednostavno zbog javnosti da objasni tako da, nekako se stekao dojam, a svi znamo da je ministar, bivši Samir Avdić, zaista na tom polju radio puno i mislim da je ta oblast dobro uređena, kao naravno i ostali. Imam jednu inicijativu, ona je vezana za izmjene i dopune Zakona o porezu na promet nekretnina i porezu na naslijeđe i poklone. Kolega zastupnik iz prethodnog saziva Skupštine, Samir Suljević je incirao izmjene ovog Zakona i tražim od Vlade da i ovaj zakon predloži Skupštini u formi nacrtu. Posebno se to odnosi na član 15, za koji predlažem da se mijenja i glasi: "Kupac koji je član porodice šehida i poginulog branioca, ratni vojni invalid i branitelj, koji je proveo najmanje 24 mjeseca u oružanim snagama Bosne i Hercegovine, a svoje stambeno pitanje rješava prvi put kupovinom stana, kuće sa okućnicom površine do 400 m, kupovinom zemljišta za izgradnju kuće do 500 m², nasljeđivanjem nekretnine, ugovora o poklonu, te po osnovu ugovora o doživotnom održavanju". Tražim od Vlade da ovu inicijativu razmotri, kao i kompletne izmjene i dopune ovog Zakona, obzirom da postoji još, evo, kako sam i naveo, inicijativa i iz prethodnog mandata kolege Suljevića i da ovaj Zakon u formi nacrtu razmatramo što prije. Ovaj član 15 konkretno se odnosi, kao što ste mogli čuti, na naše branioce i porodice, tako da u ovom dijelu oslobađanja sigurno treba uzeti u obzir i ovu kategoriju na kvalitetniji način. Eto toliko predsjedavajući.“

Zastupnik Faruk Kapidžić je podnio sljedeće (citiramo): „Pitanje za premijera Uka i za ministra privrede, a vezano za Privremenu odluku o zaštiti izvorišta vode za piće Sarajevsko polje. A tražim usmeni odgovor da li su svjesni kriminala u ovoj Privremenoj odluci koju im je ostavio prethodni ministar Adnan Delić, koji ne samo da legalizuje dosadašnji kriminal i prethodnih struktura vlasti, nego otvara mogućnost za novi, a pri tome ugrožava zdravlje i u konačnici živote ljudi. Ako im je odgovor sa da, onda će povući odluku i ne dirati granice zaštite iz 1987. Dakle, granice zaštite se mogu samo povećavati, a ne smanjivati, obzirom na rast grada i zagađenje vode. A ako im je odgovor ne, onda moraju da shvate da će snositi odgovornost, ne samo oni, nego svatko tko bude glasao za ovakvu odluku jer je ovo čisti kriminal.“

Zastupnik Mahir Dević je podnio sljedeće (citiramo): „Inicijativa prema Ministarstvu komunalne privrede, infrastrukture, prostornog uređenja, građenje i zaštite okoliša. Pokrećem inicijativu prema navedenom Ministarstvu da evo u roku od 60 dana pripremi izmjenu Zakona o prostornom uređenju Kantona Sarajevo na način da se po različitim kategorijama omogući legalizacija bespravno izgrađenih objekata u Kantonu Sarajevo. Već sam dva puta ovu inicijativu pokretao u prošlom mandatu, dobio obećanje od bivših premijera Forte da će to uraditi, nikada taj Zakon nije ugledao svjetlo dana i zaista smatramo da je ovo jedno izuzetno ozbiljno pitanje. Desetine hiljada objekata u Kantonu Sarajevo imaju u ovom momentu sve zakonske uslove da budu legalizirani i cijenimo da je došlo vrijeme da se to uradi. Evo, nek bude 60 dana, mislim da je to ministru dovoljno da se taj Zakon pripremi po skraćenom postupku. Znači on bi podrazumijevao izmjenu jednog ili dva člana, tako da poslovnički je to moguće po skraćenom postupku. I imam jedno pitanje, zamolit ću ministra privrede da mi odgovori u pismenoj formi. Kakva je to ekonomska logika u kojoj Budžet Kantona Sarajevo raste na milijardu i po konvertibilnih maraka, a poticaji za poljoprivrednu proizvodnju primarnu u poljoprivrednu proizvodnju padaju za 1.5. konvertibilnih maraka u okviru Ministarstva privrede Kantona Sarajevo. Sam budžet Ministarstva privrede je u '23. godini je već i za nekih 20/30 000 000 konvertibilnih maraka u odnosu na budžet koji je bio u 2.022. godini. Znam da pokušavate nešto da riješite oko azila tamo u Prači, ali koja je to ekonomska logika? Znači, imamo inflaciju, imamo rast budžeta, a da padaju primarni poljoprivredni poticaji, pa evo, zamolit ću vas da mi to u

pismenoj formi odgovorite u narednom projektu. Evo to je bila ta jedna inicijativa i jedno pitanje.”

Predsjedavajući Elvedin Okerić je podnio sljedeće (citiramo): „Koristim svoje pravo da podnesem inicijativu prema Skupštini Kantona Sarajevo, koja će glasiti:

"Zaključak Skupštine Kantona Sarajevo da se formira radno tijelo za izradu novog Poslovnika Skupštine Kantona Sarajevo u sljedećem sastavu: Elvedin Okerić predsjedavajući radnog tijela, Irfan Čengić, zastupnik, zamjenik predsjedavajućeg radnog tijela, Danijela Kristić, zastupnica, Vibor Handžić, zastupnik, Muamer Bandić zastupnik, Mahir Dević zastupnik, Albin Zuhrić zastupnik, Aida Zeković sekretar Skupštine, član i Amela Smailagić-Čamdžić, sekretar radnog tijela.

Zadužuje se radno tijelo iz tačka 1. ovog Zaključka da izradi tekst nacrtu Poslovnika Skupština Kantona Sarajevo, i isti dostavi Skupštini Kantona Sarajevo na nadležno postupanje u roku od 30 dana od dana donošenja ovog zaključka. Zadužuje se radno tijelo iz tačke 1. ovog zaključka da nakon utvrđivanja nacrtu Poslovnika i provedene javne rasprave, pripremi izvještaj o rezultatima javne rasprave i Skupštini Kantona Sarajevo dostavi prijedlog Poslovnika Skupštine Kantona Sarajevo na nadležno postupanje.

Ovaj zaključak stupa na snagu danom donošenja.“

Obrazloženje: Skupština Kantona Sarajevo na Trećoj radnoj sjednici usvojila je inicijativu zastupnika Irfana Čengića za donošenje novog Poslovnika Skupštine. Shodno navedenom, ovom inicijativom predlažem da Skupština formira radno tijelo koje će pripremiti tekst nacrtu i prijedloga Poslovnika i iste uputi u skupštinsku proceduru.“

Zastupnik Mahir Dević je poslovničkom intervencijom tražio da se predloženi zaključak dopuni zastupnikom Damirom Majranovićem, tako da svi participirajući politički subjekti u Skupštini Kantona Sarajevo budu ravnopravno zastupljeni, što je predsjedavajući, kao predlagač zaključka i prihvatio.

Nakon iscrpljene liste prijavljenih za pitanja i inicijative, predsjedavajući se zahvalio zastupnicama i zastupnicima na postavljenim pitanjima, i pozvao ministre da ponude odgovore na pitanja za koje je tražen usmeni odgovor.

Svoje odgovore na postavljena pitanja su ponudili: Haris Vranić, ministar zdravstva, Admir Katica, ministar unutrašnjih poslova, Nihad Uk, premijer Kantona Sarajevo, Zlatko Mijatović, ministar komunalne privrede, Pavle Krstić, ministar za nauku, visoko obrazovanje i mlade i Naida Hota-Muminović, ministrica za odgoj i obrazovanje.

Nezadovoljstvo ponuđenim odgovorima iskazali su zastupnici: Jasmin Šaljić, Admela Hodžić, Faruk Kapidžić, Muamer Bandić i Fatima Gavrankapetanović – Smailbegović, kojoj je ministar zdravstva, Haris Vranić odmah dopunio odgovor na postavljeno pitanje.

Po zaključivanju diskusije, predsjedavajući je zamolio da se šefovi klubova parlamentarnih stranaka sastanu na kratkoj pauzi u sali za sastanke kako bi se dogovorili oko izjašnjavanja po podnesenim inicijativama.

Nakon pauze, zastupnici su se izjašnjavali o podnesenim inicijativama.

Inicijativa predsjedavajućeg Elvedina Okerića za donošenje Zaključka kojim se formira Radna grupa za izradu novog Poslovnika Skupštine Kantona Sarajevo je pretrpila malu korekciju dodavanjem u zaključak zastupnika Damira Marjanovića i nakon izjašnjavanja je usvojena jednoglasno (29 „za“, bez glasova „protiv“ i „suzdržanih“).

Predsjedavajući je obavijestio zastupnicu Elzu Gaković da će njena inicijativa biti upućena na očitovanje Vladi Kantona Sarajevo obzirom da će za provedbu iste biti potrebno izdvajanje finansijskih sredstava.

Predsjedavajući je obavijestio da Deklaracija koju je podnijela zastupnica Marijela Hašimbegović treba da se tretira u skladu s članom 169. Poslovnika Skupštine Kantona Sarajevo, te je u skladu s tim pozvao zastupnice i zastupnike da se izjasne da li će navedenu Deklaraciju razmatrati po hitnom postupku.

U vezi s navedenim, poslovničkim intervencijama reagovali zastupnici: Mahir Dević, Elvedin Okerić, Irfan Čengić i Muamer Bandić.

Potom je predsjedavajući pozvao zastupnice i zastupnike da se izjasne da li se treba o podnesenoj Deklaraciji zastupnice Marijele Hašimbegović izjašnjavati po hitnom postupku.

Na osnovu rezultata glasanja, predsjedavajući je konstatovao da Skupština nije podržala hitnost za izjašnjavanje po podnesenoj deklaraciji s 9 glasova „za“, 3 „protiv“ i 12 „suzdržanih“.

Zastupnik Mahir Dević je zamolio da mu se pojasni da li će se o podnesenoj Deklaraciji izjašnjavati na narednoj sjednici Skupštini, na što mu je predsjedavajući odgovorio da istu treba dostaviti u skladu s Poslovníkom i da će se postupati kao i sa svim odlukama.

Realizacija tačke dva.

AD-2.

Verifikacija odluka Odbora za javna priznanja

Zastupnici su materijal dobili uz poziv za sjednicu. Uvodno izlaganje je podnio predsjedavajući Elvedin Okerić, kao predsjedavajući Odbora za javna priznanja Kantona Sarajevo.

Pitanja su postavili zastupnici: Damir Marjanović, Irfan Čengić i Muamer Bandić, a odgovore su im je ponudili predsjedavajući Odbora za javna priznanja Elvedin Okerić i sekretar Skupštine, Aida Zeković.

Poslovníčku intervenciju je imao zastupnik Muamer Bandić.

U replikama su učestvovali zastupnici: Irfan Čengić, Elvedin Okerić i Muamer Bandić.

Zastupnik Davor Čičić je tražio pauzu od pola sata u ime Kluba SDP-a, kako bi pripremili zaključak koji će ponuditi zastupnicima na izjašnjavanje.

NASTAVAK NAKON PAUZE

U nastavku nakon pauze predsjedavajući je pročitao Zaključak koji je stigao ispred Kluba SDP-a, a koji glasi:

"Skupština Kantona Sarajevo će se izjašnjavati pojedinačno o svakoj Odluci o verifikaciji dodjele priznanja Kantona Sarajevo za 2022.godinu, koje su na dnevnom redu Sedme sjednice Skupštine Kantona Sarajevo".

Potom je zamolio zastupnice i zastupnike da se izjasne po istom.

Na osnovu rezultata glasanja, predsjedavajući je konstatovao da zaključak nije dobio potrebnu većinu s 13 glasova „za“, 5 „protiv“ i 9 „suzdržanih“ glasova.

Obzirom da nije bilo prijavljenih zastupnika za diskusiju, predsjedavajući je zamolio da se pristupi izjašnjavanju o Prijedlogu odluka o verifikaciji Odluka Odbora za javna priznanja Kantona Sarajevo za 2022. godinu.

Na osnovu rezultata glasanja, predsjedavajući je konstatovao da Skupština nije podržala Prijedlog Odluke o verifikaciji Odluka Odbora za javna priznanja Kantona Sarajevo za 2022. godinu, s 12 glasova „za“, 2 „protiv“ i 11 „suzdržanih“ glasova.

Na zahtjev predsjedavajućeg Kluba Stranke za BiH, Muamera Bandića, predsjedavajući je zamolio sekretara Skupštine da provede pojedinačnu prozivku zastupnika.

Zastupnik Muamer Bandić je tražio da se pozovu zastupnici koju su u hodniku da uđu u salu i glasaju, na što su reagovali poslovnim intervencijama zastupnik Haris Zahiragić i Muamer Bandić.

Predsjedavajući je dao pauzu od pola sata na zahtjev predsjedavajućeg Kluba Stranke za BiH, Muamera Bandića.

NASTAVAK NAKON PAUZE

U nastavku nakon pauze, sekretar Skupštine, Aida Zeković, je provela prozivku zastupnika za pojedinačno izjašnjavanje.

Na osnovu rezultata pojedinačnog izjašnjavanja, predsjedavajući je konstatovao da *Prijedlog Odluke o verifikaciji Odluka Odbora za javna priznanja Kantona Sarajevo za 2022. godinu, nije dobio potrebnu većinu, s 12 glasova „za“, 1 „protiv“ i 14 „suzdržanih“ glasova.*

Realizacija tačaka tri, četiri i pet.

AD-3.

Prijedlog Odluke o izmjeni naziva ulice, odnosno preimenovanje ulice, na području Općine Novo Sarajevo

AD-4.

Prijedlog Odluke o davanju naziva cesti, na području Općine Stari Grad Sarajevo;

AD-5.

Prijedlog Odluke o davanju naziva dijelu ulice na području Općine Centar.

Predsjedavajući je predložio, a Skupština jednoglasno podržala (26 glasova „za“, bez glasova „protiv“ i „suzdržan“) da se objedini rasprava po tačkama tri, četiri i pet Dnevnog reda, obzirom da se radi o istoj tematici.

Uvodno izlaganje je podnio predsjedavajući Komisije za obilježavanje, čuvanje i njegove historijskih događaja i ličnosti, zastupnik Elvis Vreto.

Pitanje za Predlagača je imala zastupnica Vildana Bešlija, na koje joj je predsjedavajući Komisije Elvis Vreto dao odgovor.

Obzirom da nije bilo prijavljenih zastupnika za diskusiju predsjedavajući je pozvao zastupnike da se izjasne za svaku odluku pojedinačno.

Na osnovu rezultata glasanja, predsjedavajući je konstatovao da je:

Prijedlog odluke o izmjeni naziva ulice, odnosno preimenovane ulice na području Općine Novo Sarajevo dobio jednoglasnu podršku s 25 glasova “za i bez glasova “protiv” i “suzdržan”.

Prijedlog odluke o davanju naziva cesti na području Općine Stari Grad Sarajevo dobio jednoglasnu podršku s 26 glasova “za i bez glasova “protiv” i “suzdržan”.

Prijedlog odluke o davanju naziva dijelu ulice na području Općine Centar dobio jednoglasnu podršku s 26 glasova “za” i bez glasova “protiv” i “suzdržan”.

Realizacija tačke šest dnevnog reda.

AD-6.

Prijedlog odluke o imenovanju Etičkog vijeća Skupštine Kantona Sarajevo

Zastupnici su materijal dobili u dopunskom materijalu. Predsjedavajući Okerić je kao predsjedavajući Komisije za izbor, imenovanja i administrativna pitanja podnio uvodno izlaganje.

Nije bilo prijavljenih zastupnika za pitanja ili diskusiju pa je predsjedavajući pozvao zastupnice i zastupnike da se izjasne o prijedlogu odluke.

Na osnovu rezultata glasanja, predsjedavajući je konstatovao da je Prijedlog odluke o imenovanju Etičkog vijeća Skupština Kantona Sarajevo dobio jednoglasnu većinu s 26 glasova “za” i bez glasova “protiv” i “suzdržan”.

Realizacija tačke sedam dnevnog reda.

AD-7.

Prijedlog odluke o izmjeni Odluke o izboru predsjedavajućih, zamjenika predsjedavajućih, članova stalnih radnih tijela Skupštine Kantona Sarajevo

Zastupnici su materijal dobili u dopunskom materijalu. Kao predsjedavajući Komisije za izbor, imenovanja i administrativna pitanja, predsjedavajući Okerić je podnio uvodno izlaganje.

Nije bilo prijavljenih zastupnika za pitanja ili diskusiju pa je predsjedavajući pozvao zastupnice i zastupnike da se izjasne o prijedlogu odluke.

Na osnovu rezultata glasanja, predsjedavajući je konstatovao da je Prijedlog odluke o izmjeni Odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo dobio jednoglasnu većinu s 25 glasova “za” i bez glasova “protiv” i “suzdržan”.

Realizacija tačke osam dnevnog reda.

AD-8.

Program obilježavanja Dana Kantona Sarajevo od 02. do 09. 5. 2023. godine.

Zastupnici su materijal dobili u dopunskom materijalu. Obzirom da nije bilo predstavnika Predlagača, izvjestan period se čekalo da isti dođe, a na kraju su zastupnici bili stava da im nije potrebno uvodno izlaganje i nije bilo prijavljenih za pitanja ili diskusiju, te su se izjasnili o Programu.

Na osnovu rezultata glasanja, predsjedavajući je konstatovao da je Prijedlog programa obilježavanja Dana Kantona Sarajevo od 02 do 9. 5. 2023. godine, dobio jednoglasnu većinu s 24 glasa “za” i bez glasova “protiv” i “suzdržan”.

Na kraju zasjedanja je predsjedavajući je uputio čestitke u povodu Ramazanskog bajrama svim muslimanima u Kantonu Sarajevo i Bosni i Hercegovini.

Konstatovano je da je iscrpljen dnevni red Sedme radne sjednice Skupštine Kantona Sarajevo, te je predsjedavajući zaključio sjednicu i zahvalio se kolegicama i kolegama na radu.

* * *

Sastavni dio ovog zapisnika su stenografske bilješke, audio snimak sjednice, koji se čuvaju u Službi za skupštinske poslove Skupštine Kantona Sarajevo.

Broj: 01-04-9182/23
19.04.2023.godine
SARAJEVO

Zapisnik izradila:

Lejla Kadrić

S E K R E T A R

SKUPŠTINE KANTONA SARAJEVO

Aida Zeković

P R E D S J E D A V A J U Ć I

SKUPŠTINE KANTONA SARAJEVO

Elvedin Okerić